













PROTESTATION
ET DERNIERE
RESOLUTION
DV ROY D'ANGLETERRE,
Protecteur & deffenseur des
Eglises Reformees.

M. DC. XXII

Case

F

39

326

PROTESTATION

ET DERNIERE

RESOLUTION

BY ROY DANGEROUS
LIBRARY

Protestation & Résolution des

Églises Réformées.

M. DC. XXII



PROTESTATION ET
RESOLUTION DV ROY
d'Angleterre, protecteur & def-
fenseur des Eglises Reformees.

POur donner contentement à
ceux qui entrent en soupçon
& deffiance du suiet de la le-
uee de nos forces, & qui desirent estre
esclaircis de nostre intention. Veu le
commun bruit qui s'espend par tout,
que c'est pour donner secours aux sujets
rebelles (ainsi qu'ils les appellent) du
Roy de France. Je m'estonne de ce
qu'on trouue estrange que pendant vne
esmotion generale qui est presque en-
tre tous les peuples de la Chrestienté, &
sur tout en l'Estat de l'Empire, nous
nous soyons munis de forces suffisantes
pour faire teste à quiconque auroit l'as-
seurance de nous venir affronter. Mes-
mes voyant l'ennemy dans nos entrail-
les qui enuahit & destruit le pays de nos
amis & alliez. Aussi ne puis-je croire

pouoir encourir blasme. (l'entends de ceux qui sont douiez de raison & sens commun,) si estans griefuement elmeus tant d'amitié que de compassion, digne à la verité d'un Prince Chrestien & humain, & qui nous est commune avec tous les Princes de la Confession d'Ausbourg, des horribles afflictions qu'endurent & souffrent tous ceux qui yrayement font profession de la Religion Chrestienne reformee, comme membres de Iesus Christ qui sont au Royaume de France : Nous ne les pouuons mettre en oubly : Ains auons estimé estre obligez de leur promettre sous certaines conditions iustes & necessaires pour le salut de la France & conseruation de l'autorité du Roy tres Chrestien de les ayder & secourir en ceste extremité dernière de tous nos moyens & nos forces. Car nous sommes bien asseurez qu'ils ne sont en aucune chose qui concerne la puissance & autorité royale desobeissans à la dignité, & qu'ils n'ont iamais entrepris, moins encores le veulent ils faire contre la personne du Roy, son autorité, ou son Estat.

comme ils en sont accusez sans raison, sans argument & sans apparence. Ains au contraire qu'ils sont & seront toujours prests d'employer leurs biens & leurs vies pour son seruice, & de luy rendre à iamais es choses politiques & temporelles toute l'obeyssance qu'ils doiuent par le commandement de Dieu, moyennant qu'on les laisse en liberté de conscience iouyr de l'exercice de leur Religion suiuant ses ordonnances & Edicts violez & enfreints par la force, violence & conūration publique de quelques vns ennemis du repos dudit Royaume: desquels mesmes les entreprises trop cogneuës par tout se sont desbordées iusques là, sans auoir esgard à la foy violée (qui est deuant tous hommes vne rebellion insigne contre le Roy mesme, & vn scandale horrible par toute la terre contre le bon renom de la nation Françoisse.) Que de se vouloir s'ayder des principaux chefs de ladite Religion, pour leur faire perdre apres honteusement la vie. Et afin que le Roy cognoisse avec qu'elle fidelité & assurance tous ses subiects de la Religion

marchent deuant Dieu & les hommes,
 qui veulent sans trouble d'esprit descen-
 dre au iugement de la iustice, de leur
 cause, & qu'il n'y a subiets au monde
 plus esloignez de rebellion & sedition
 dont ils sont contre toute raison & equi-
 té diffamez & noircis par l'imposture
 de leurs ennemis. Ils ont protesté que
 si durant ceste presente guerre nous co-
 gnoissions qu'ils cherchent autre chose
 par la deffence de leurs armes que d'e-
 stre entretenus sous la dignité de la
 Couronne & autorité du Roy, de ses
 loix & de ses Magistrats, au plein & en-
 tier exercice de leur Religion sans aucu-
 ne distinction de lieux ou de personnes
 de quelque qualité ou dignité qu'elles
 soient, avec les seurtez requises en tel
 cas pour tout l'aduenir autres que celles
 qu'on leur a baillées cy deuant puis que
 par tant de fois on les à massacrez, pillez,
 & ruinez de fonds en comble contre la
 foy publique & les loix de la paix, &
 conferuez en leurs biens, honneurs,
 Estats, Offices & dignitez, & qu'ils vou-
 lussent sous pretexte de Religion se re-
 tirer & separer en aucune chose ciuile &

temporelle de l'obeyssance qu'ils doi-
uent à la Majesté ou bien attenter quel-
que chose contre elle & son Estar. Tant
s'en faut qu'ils desirerent & entendent que
nous les secourions en vn si malheureux
dessein, qu'ils nous prient tres-instam-
ment non seulement de les abandonner
& nous retirer d'eux. Mais qui plus est
de nous ioindre à sadite Maieité pour
les deffaire & opprimer sans pardon &
misericorde, comme les plus meschans,
des obeissans & rebelles qui furent on-
ques.

Outre ceste leur protestation, c'est ar-
gument est trop certain pour confirmer
qu'ils ne sont poursuiuis & affligez que
pour la conscience & la Religion, &
qu'ils ne se tiennent sur la defensiue que
pour ce suiet. Qu'ils exposent leurs
corps, leurs vies, enfans, estats, biens &
honneurs pour ceste cause, autrement
s'ils estoient excitez de quelque ambi-
tion, ou brullez du desir des biens &
honneurs de ce monde, ils eslieroient
pluistost comme aucuns sortis d'entr'eux
& qui n'estoient des leurs de viure en
paix en leur patrie & leurs maisons, avec

leurs femmes, enfans, parens & amis, que d'estre trauallez, bannis, meurtris, pilliez & persecutez comme ils sont, mais comme vrais & fideles Chrestiens, cherchant premierement le Royaume des Cieux, ils ont deuant les yeux ces sentences de Iesus Christ. Qui conque ayme sa vie, pere, mere, femmes ou enfans plus que moy n'est pas digne de moy, & qui me confessera deuant les hommes ie l'auoueray & cognoistray deuant mon pere, mais ie ne recognoistray point au ciel celuy qui aura honte de me confesser en la terre.

Auec tous leurs deportemens qui ne sont en rien esloignez de l'office de bons & fidelles subiets, & les iustes offres & submissions qu'ils font. Cecy encore descouure ouuertement la verité de leurs complaints. Que pour empescher le secours qu'ils pouuoient attendre ils ont esté chargez & diffamez par les Ambassadeurs, despechez de leurs ennemis vers les Princes estrangers sous le nom & autorité du Roy des crimes cy dessus mentionnez: mesmes depuis peu deuant nous, les Estats des Prouinces vnies & plusieurs

plusieurs Princes de l'Empire auxquels ils ont fait la mesme protestation qu'à nous: ce qui n'est incogneu à sadite Maieité. Et tant s'en faut qu'ils soient trouuez coupables des crimes de rebellion qui leur sont imposez, qu'il ne se pourra iustifier qu'ils ayent commis chose aucune en leur deffence pour la conseruation de leur Religion & vie, qui n'aye esté cy deuant approuuee par les Roys predecesseurs de sadite Maieité en faict semblable en ceux qui les ont precedez, quand estans iniustement poursuiuis pour mesme cause, & qu'ils se sont mis sur la defensiue, ils ont esté aduoüiez par les Edicts de paix pour fidelles & obeissans suiets & seruiteurs de sadite Maieité. Les articles desdits Edicts confirmans tout ce qu'ils auoient fait: comme faict à bonne intention & pour leur seruir, tous lesquels Edicts toutesfois au grand mespris & deshonneur de la France & de leurs Maiestez, n'ont esté executez par les pratiques & coniurations publiques de leurs ennemys.

Estant donc leur misere extreme & la iustice de leur cause telle, il n'y a rien

plus conuenable au deuoir d'un Prince Chrestien ny plus vtile & necessaire pour le bien de la Couronne & Estat François que d'en auoir pitié: car on ne peut nier qu'il ne soit icy question de la defense & conseruation des plus anciennes familles de toute la Noblesse, des premiers & principaux membres de tout l'Estat, des plus notables & remarquables personnes en vertu, prudence, experience, dignité, autorité & reputation, qui iustement & franchement recognoissent sa Maiesté tres-Chrestienne pour leur Roy souuerain, seigneur & Prince naturel, sacré & estably de Dieu pour leur commander en toutes choses politiques, ciuiles & temporelles. Luy rendans en cela sans aucune difficulté tout le deuoir & obeysance qu'ils luy doiuent. Or il est certain que la ruine de telles personnes membres de l'Estat ne peut estre esloignee de la ruyne ineuitable du Royaume. Ce que l'on peut aisément iuger. Car aussi peu se pourroit soustenir ceste couronne & se deffendre en la necessité sans ceux desquels il est maintenant question (veu qu'il y va de

la ruyne des Princes & de la Noblesse qui a esté tousiours la seule force de la France) qu'un corps sans nerfs sans iam-
bes & sans bras.

Et combien que leurs aduersaires ne cognoissent que trop que la longue suite des troubles apportera sans aucune doute la ruyne de l'Estat comme il n'y a homme doié de raison & sens commun (s'il n'est de nature & de profession ennemy dudit Royaume) qui ne cognoisse & ne deplore ce malheur. Et qu'ils deussent à bõ esciét les premiers mettre la main pour les esteindre & appaiser. Si est-ce que d'une audace incroyable, ils abusent du nom & autorité de ladicte Maiesté, mesprisent ses Edicts, les cassent & violent sans respect & sans crainte, l'enflamment de plus en plus, pour courir sus à ses bons subiets, leuent de toutes parts des Estrangers sous son nom pour les piller & massacrer, & pour les empescher de iouyr de la Paix, tant de fois faite & confirmee, sous couleur de laquelle lesdits bons & fidelles subiets ont tousiours esté pillés, meurtris & bannis, leurs femmes & filles publique-

ment rauies & violees , les enfans tuez entre les bras de leurs nourrices , voire que sans distinction de sexe , sans auoir esgard aux femmes grosses , aux ieunes & aux vieux , aux nobles & aux roturiers , pauures ou riches , petits ou grands , on a durant la Paix fait par toute la France , vne sanglante boucherie desdits pauures subiets , qui font profession de la Religion.

Par leurs requestes mesmes & remonstrances faites en plein Conseil à sadite Maiesté , pour luy declarer leur misere , auoir quelque iustice & estre aucunement releuez des oppressions desquelles ils sont accablez , on voit des meurtres si cruels commis contre la foy publique , sur eux , leurs femmes & enfans , que les Scithes les plus barbares : Voire les Lyons & les Ours en auroient horreur. Car encores que de tout temps la terre ayt supporté des Tygres deguisez sous forme humaine , bruslans de desir d'aualer à longs traits le sang humain , si est-ce qu'il n'y a histoire ny sainte ny prophane , qui face mention de chose aucune qui en approche.

Et encores que toutes choses soient en telle fureur extremement à deplorer, si est-ce qui s'enfuit l'est plus que tout le reste, que tous ces sanglans meurtres soient faits sous le nom & autorité de sadite Maiesté; & qui plus est par ceux qui ont les forces en la main, qui se courent de ce pretexte, que ceux là sont rebelles desquels ils espandent le sang, combien que la pluspart de ceux qui iusques icy, ont esté cruellement meurtris, fussent ou vieillards, ou femmes & enfans, qui tous ensemble pour leur crainte & infirmité, ne sont propres pour porter les armes, & aucuns d'eux pour leur aage & simplicité ne peuuent pas sçauoir que c'est que rebellion.

Et pour monstrier encore mieux que ceste accusation de leze Maiesté, sedition & rebellion, n'est aucunement vray semblable, il ne se peut verifier qu'aucun de ceux qui font profession de la Religion Reformee ait iamais violé les loix du Royaume, en ce qui concerne sa paix & son repos.

Que si on allegue qu'ils ont commis choses qui ont offensé la Maiesté, il est

de la iustice de separer la faute & iniure
privee de la iustice & equité d'une cause
commune & de conseruer l'innocence
sans l'opprimer sous le fardeau de la
faute d'autrui.

Or combien que leurs ennemis d'eus-
sent estre contents d'auoir tant espan-
du de sang contre les Edicts & Ordonnan-
ces. Si est-ce que marchant tousiours
d'une cruauté, iniustice & impieté en
une autre, ils veulent persuader à sa Ma-
iesté de les bannir de son Royaume, de
n'y permettre ou receuoir autre Reli-
gion que la Papale, & d'obliger absolu-
ment tous ses subiets à l'observation
entiere du Concile de Trente. Ce qui
ne peut trainer avec soy qu'une effusion
miserable du sang des Innocens & un
dernier malheur audit Royaume.

Sa Majesté pressée de ce Conseil doit
meurement penser qu'elle charge de
conscience elle attire dessus soy par une
telle oppression de tant de gens de bien.
Peché certes inexcusable au dernier
iour deuant le Seigneur, qui en sa fureur
requerra le sang iniustement & cruelle-
ment espandu sous son sceptre & son au-
torité.

Les saintes Escritures nous fournissent assez de tesmoignages pour nous asseurer combien la mort des saints est precieuse deuant Dieu, & son fils Iesus Christ nostre Seigneur nous enseigne que qui les persecute le persecute & celuy qui l'a enuoyé.

Outre le pesant fardeau que sadite Maiesté charge sur sa conscience, elle peut aysément iuger qu'elle ruyne apporteront en France tant d'estrangers qu'on met de toutes parts dedans, & si elle veut prendre la peine de se faire lire les histoires de ses Majeurs, elle recognoistra qu'ils se sont sagement retenus de faire le semblable ou de donner occasion à d'autres de le faire.

Que si outre les contempteurs de Dieu ou qui de certaine science ou malice desesperee s'opposent à son regne, il y en a aucuns qui pensent s'excuser de tant de cruantez qu'ils font sur vn zeile indiscret esloigné de toute prudence. Ils s'abusent du tout: Car on ne peut contenter Dieu ou l'appaiser d'un zeile sans science qui luy desplaist, & qu'il punit ordinairement. L'exemple de saül

est manifeste qui persecutant les Chrestiens pour satisfaire au zele qu'il auoit à la loy, ouÿt avec estonnement & reprehension tres-iustes ces paroles du ciel, *Pourquoy me persecutes tu?*

Et d'autant que tout le different de ceste affaire ne touche en rien les choses temporelles dudit Royaume. Mais seulement la conscience des subiets que Dieu tres-bon & tres-puissant s'est reseruee sans la vouloir assuiettir à la puissance & iurisdiction des hommes pour luy prescrire loy en ce qui concerne son seruice, il seroit tres-vtile que sadite Maiesté se proposast deuant les yeux le conseil de Gamaliel, *Que si ces affaires ne sont point de Dieu elles s'esuanoüiront d'elles mesmes.* Au contraire si Dieu les fauorise toute la puissance des hommes ne les peut empescher, ce qui se confirme par tous les auteurs qui ont escrit de l'Estat de l'Eglise.

Ce chemin seroit donc tres-seur pour assseurer la paix dans ledit Royaume, si on ne presse point en ce qui concerne la foy enuers Dieu, & le deuoir à son seruice, la conscience de tous ceux qui ne
veulent

veulent s'assuiettir à la Religion Romaine : Qui toutesfois en ce qui est de la police & de l'obeyssance qu'ils doiuent à sadite Maiesté selon la parole de Dieu, recognoissent ses loix comme très-humbles & tres-fidelles subiets qui offrent leurs corps & leurs biens pour son service, & si sans nulle exception de lieux ou de personnes on leur permet de se renger en toute liberté à l'exercice de leur Religion, ainsi quelle est comprise en leur confession de Foy, par eux cy deuant presentee, sans estre pour cela ou empeschez ou recerchez à l'aduenir ny molestez en leurs vies, biens, estats, offices, honneurs & dignitez, & en les traitant en toutes choses comme les autres qui font profession de la Religion Romaine, d'autant que l'inegalité a esté de rout temps la mere des seditions & des troubles d'Estat. Par ce moyen, sa Maiesté pourra empescher & retrancher à l'aduenir le cours de tant de maux qui menacent ledit Royaume, & s'il veut ensuiure comme vn exemple remarquable, la loy establee en l'Empire pour la defese & cōseruation de la tran-

quilité publique, touchant les differens qui s'ôt au fait de la Religio, il pourra ay-
sement reſtablir & garder la paix & vniõ
commune entre ſes ſubiets. Car ce qui ſe
pratique entre tât de differēs Princes de
Religion & d'Eſtat dedans vn Empire,
ſe peut ſans doute pratiquer entre les
ſuiets d'un Royaume & avec bien plus
de raiſon, ſi ſans aucune conuiuence on
faict egallement punir tous les pertur-
bateurs & infraſteurs de la paix & du re-
pos public, ſans exception de perſonnes
ou de Religion.

Pour ces raiſons, nous prions de toute
noſtre affection ſadite Maieſté de pren-
dre en bonne part, ſi en Prince Chre-
ſtien & pour iuſtes & grandes cauſes ne-
ceſſaires pour la manutention de ſon
eſtat. Nous auons promis de donner de
toutes nos forces & moyens iuſques à la
fin de la guerre, ſecours à tous ceux qui
de meſme Religion & profeſſion que
nous, ſont pour icelle perſecutez en ſon
Royaume, ainſi qu'ils en ſont dignes
côme vn chacun le peut iuger: car enco-
res qu'ils ſoient contraints par neceſſi-
tez extremes & infinies iniures, de re-

courir aux armes iustement permises de Dieu pour la defense des loix, de leurs vies, de leurs femmes, enfans & biens, contre la rage & fureur enuemiee de leurs aduersaires. Si est-ce neantmoins qu'ils sont & seront tousiours prests quelque force qui les assiste de luy obeyr ainsi qu'ils doivent, & pouuons à la verité & deuant Dieu asseurer sadite Maiesté, que nous auons cogneu en eux vn ducil & regret extreme d'estre forcez pour la defense de leurs vies sous son obeyssance, & la iustice de ses loix de recourir aux armes, qu'ils desirent plus de poser que d'en vser, moyennant qui leur soit permis sous les conditions des seuretez requises pour le temps à venir, de iouyr librement de l'exercice entier de leur Religion.

Que si peut-estre on nous accuse deuant sadite Maiesté de regarder à autre fin en ceste sainte & loüable entreprise, grandement necessaire pour le bien de la Chrestienté, qu'à la defense & conseruation de l'autorité de sadite Maiesté. Nous la prions affectueusement de leuer ce soupçon & de n'en rien croi-

re, Car nous asseurons sadite Maiesté en saine conscience & avec verité, que nostre intention n'est point d'opprimer, foutrager, gaster, saccager ou piller son Royaume ou ses subiets, mais plustost de nous efforcer de les defendre & conseruer sous son obeyslance: & de continuer de nostre part de plus en plus en toutes choses, non contraites à la gloire de Dieu, à la defense & conseruation de tous les membres & de tous les associez de la Religion, dont ie fais profession. La bonne amitié qui a tousiours esté nourrie entre les Roys de France ses predecesseurs, & sadite Maiesté & les Princes de l'Empire. Ce que nous monstrerons tousiours par effect & experience à la premiere occasion qui se presentera, afin que sadite Maiesté puisse cognoistre de quelle entiere affection nous desirons nous employer en toutes choses qui touchent sa personne, son Estat & ses subiets, exceptant tousiours le Religion & le saint Empire d'Allemagne.

Et pour en faire vne preuue asseuree, & en donner des arres infailibles, Nous promettons dès maintenant, en foy &

parole Prince , non seulement de nous retirer , mais aussi de quitter tous nos interests, aussi tost que sans dol ou fraude, on permettra à tous les subiers de sadite Maïesté de la Religion , de quelque dignité ou qualité qu'ils soient, l'exercice libre & entier de leur dite Religion, sans aucune distinction de lieux ou de personnes, avec l'entiere iouissance de leurs biens, honneurs, estats dignitez & offices, sous les conditions & seurtez requises, pour l'accomplissement & entretenement de ces choses à l'aduenir.

Et pour conclure, Nous voulons bien bien que sadite Maïeste soit aduertie que nous protestons deuant Dieu, que si nostre aduertissement procedant d'un bon cœur & d'une sainte affection n'est bien receu, & si les autheurs de ses troubles continuant leurs fureurs, accroissent à nostre veüe le malheur par toute la France, avec beaucoup plus de ruine & d'effusion de sang qu'auparauant, Nous n'estimons pas qu'on nous doïue ou puisse imputer la faute de ces calamitez extremes: moins encores que cy apres on nous surcharge de ce qui ad-

tiendra par la temerité & rage desbor-
dee de ceux qui empeschent la paix &
qui troublent l'Estat, nous assurant que
aureste que la seule necessité & la iustice
de la cause, verifiera tousiours deuane
toute la Chrestienté, l'equité de nostre
entreprise.

Voila en bref ce que nous auons estimé
(l'occasion le requérant & la necessité)
que nous deuions mettre en auant pour
satisfaire à ce qu'on à requis de nous de
la part de sadite Maiesté, & pour l'assieu-
rer qu'il n'y a nul deuoir digne d'un sei-
gneur & bon amy, & qui luy puisse estre
agreable pour conseruer son amitié &
bonne grace, que nous ne soyons tou-
siours prests de faire de bon cœur.

FIN.



















